

**Nunatsinni palasissaaleqineq qaangerniarlugu palasinnngorniarluni ilinniartitaanerup nunatsinniiginnarnissaanik, kiisalu nunatsinni ilageeqarnerup ingerlanneqarneranut kulturitsinnullu naleqquttumik aallaaveqarnissaanik Naalakkersuisut sulissuteqaqqullugit peqquneqarnissaannik Inatsisartunut aalajangiiffigisassatut siunnersuut.**

(Inatsisartunut ilaasortat Ruth Heilmann, Kristian Jeremiassen, Siumut)

### **Akissuteqaat**

(Ilinniartitaanermut, Ilisimatusarnermut Nunanullu Avannarlernut suleqateqarnermut Naalakkersuisoq)

### **Siullermeerneqarnera**

Inatsisartut aalajangigassaattut siunnersuut qulaani taaneqartoq Naalakkersuisut tungaannit qujassutigaarput. Aalajangigassatut siunnersuut marlunnik immikoortortaqqarpoq. Aappaata imaraa palasinnngorniarluni ilinniarnep Ilisimatusarfimmiiginnarnissaa, aappatalu siunertaralugu palasissaaleqinerup qaangerniarnissaa.

Akilerartarnermut Atugarissaarnermullu Ataatsimiititaliap isumaliutissiissutaata Naalakkersuisullu Ilinniartitaanermut periusissianik nalunaarusiaata april 2012-imeersup tamarnik erseqqissarpaat ilinniartitaanerit pitsaassusiisa pingaaruteqarnerat.

Palasinnngorniarluni Ilisimatusarfimmi ilinniarnep ukiunik pingasunik sivilissuseqarpoq, paasineqarporlu nunani allani pitsaassutsinit appasinnerusoq. Assersuutigalugu Ilisimatusarfimmit bachelorit upperisamik Danmarkimi qaffasinnerusumik ilinniarnep isersinnaanngillat, oqaasitoqqanilli biibilip allaqqaarnerani atorineqartunik ilinniartinneqqaartariaqarlutik.

Taassuma saniatigut Ilisimatusarfimmi upperisamik ilinniarnep bachelorit palasinnngorniat Danmarkimi ilinniarnep (pastoralseminariami) ukiup affaa pikkorissaqqaartariaqarput Nunatsinni palasinnngorsinnaajumallutik. Tassa Ilisimatusarfimmi upperisarnep bachelorit Nunatsinni palasinnngussagunik Danmarkimukaqqaartariaqarput.

Naalakkersuisuttaaq tikkuarniarpaat ilinniartut ima ikitsigimmata ilinniartumut ataatsimut aningaasartuutit naleqqutinnigsumik qaffasissuseqarlutik. Naatsorsuutigineqarporpimi 2012-imi naammassisut pingasuujumaartut, 2013-imi ataaseq, 2014-imi sisamat 2015-imilu pingasut. Tassa taama amerlassuseqassapput maannakkut ilinniartuusut tamarnik ilinniarnep naammassinissappata.

Tamaattumunguna upperisamik Ilisimatusarfimmi ilinniarnep unitsinneqarnissaa eqqarsaatersuutigineqartoq.

Naalakkersuisuttaaq innersuussutigissavaat Inatsisartunut ilaasortap Ruth Heilmannip upperisamik ilinniartitaaneq pillugu § 37, imm. 1 malillugu apeqqutaanut akissut 27. april 2012-imeersoq.

Upperisamik ilinniartitaaneq maanna ingerlanneqartoq qulaani tunngavilersorneqartut naammaginangimmat, Nunatsinni palasissaaleqinerup qaangerniarnissaanik apeqqummut nutamik eqqarsarnissaq tunngaviusariaqarpoq, ilinniartitseriaatsit nutaat eqqarsaatiginissaat ilanngullugu.

Siunertamut tassunga atatillugu suleqatigiissitaliortoqalerpoq, tassanilu sinniisoqassapput Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik, Iisimatusarfik, Kalaallit Nunaanni Ilagiit aamma Ilinniartitaanermut Iisimatusarnermullu Naalakkersuisoqarfik.

Suleqatigiissitat taakku suliassarissavaat palasinngorniarluni ilinniartitaanermut, upperisarsiornermik (teologimik) ilinniartitaanerunngitsumut, siunnersuutissat aalajangersimasut, Kalaallit Nunaanni Ilagiinnut taamaallaat sammisitat.

Suleqatigiissitat siullertut ilinniartitseriaatsinik siunnersuusiussapput Kalaallit Nunaanni Ilagiinnut taamaallaat sammisitamik palasinngorniarluni ilinniartitsinermik qulakkeerinnittussamik. Tamanna assersuutigalugu pisinnaavoq Kalaallit Nunaanni Ilagiit ilinniartitaanerullu ingerlanerata imminnut ataqatigiissaarnerisa qulakkeerneratigut

Taamattaq eqqarsaatigineqarpoq suleqatigiissitat siunnersuusiorfigissagaat aalajangersumik sammivilimmik tulluussakkamillu palasinngorniat ilinniartitaanerata ilinniarusuttunut ima kajungernartiginissaa, palasissatut ilinniareerlutik siunissami naammassisussat amerlassusii pisariaqartitsinermut tulluuttunngorlutik.

Suleqatigiissitat iliuuseriniakkap aningaasalersorneqarnissaanut tunngasunik isumaqatigiinniartussaangillat, isumaqatigiinniarnernerujumaartunulli taamaattunut tunngavissanik qulaajaanissaq qulakkeerniassavaat.

Naatsorsuutigineqarpoq suleqatigiissitaq siunnersuuteqarumaartoq 2013-ip aallartilaarnerani.

Akissuteqaat una Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfimmu tusarniaassutigineqarsimavoq, akissutaallu allatamut uunga ilanngunneqarput.

Taamaattumik Naalakkersuisut siunnersuutigaat oqaluuserisassaq kinguartinneqassasoq suleqatigiissitat siunnersuuteqareernissaannut.